

MICHEL DE MONTAIGNE
ESSAYS



Book 1 · Chapter 26

Original text in Middle French (1595, Public domain) · Last updated on July 15, 2024

HYPERESSAYS is a project to create a modern and accessible online edition of the *Essays* of Michel de Montaigne. More information at www.hyperessays.net

GOURNAY-1-26-20250106-190926

C'est folie de rapporter le vray et le faux à nostre suffisance

^a CE n'est pas à l'avanture sans raison, que nous attribuons à simpleesse & ignorance, la facilité de croire & de se laisser persuader : Car il me semble avoir appris autrefois, que la creance estoit comme une impression, qui se faisoit en nostre ame ; & à mesure qu'elle se trouvoit plus molle & de moindre resistance, il estoit plus aisé à y empreindre quelque chose. ^c *Vt necesse est lancem in libra ponderibus impositis deprimi : sic animum perspicuis cedere.* D'autant que l'ame est plus vuide, & sans contrepoids, elle se baisse plus facilement sous la charge de la premiere persuasion. ^a Voilà pourquoy les enfans, le vulgaire, les femmes & les malades sont plus sujets à estre menez par les oreilles. Mais aussi de l'autre part, c'est une sottise presumption, d'aller desdeignant & condamnant pour faux, ce qui ne nous semble pas vray-semblable : qui est un vice ordinaire de ceux qui pensent avoir quelque suffisance, outre la commune. J'en faisois ainsi autrefois, & si j'oyois parler ou des esprits qui reviennent, ou du prognostique des choses futures, des enchantemens, des sorcelleries, ou faire quelque autre conte, où je ne peusse pas mordre,

^a *Somnia, terrores magicos, miracula, sagas,
Nocturnos lemures, portentáque Thessala :*

^a il me venoit compassion du pauvre peuple abusé de ces folies. Et à present je treuve, que j'estoy pour le moins autant à plaindre moy mesme : Non que l'experience m'aye depuis rien fait voir, au dessus de mes premieres creances ; & si n'a pas tenu à ma curiosité : mais la raison m'a instruit, que de condamner ainsi resolutement une chose pour fausse, & impossible, c'est se donner l'avantage d'avoir dans la teste, les bornes & limites de la volonté de Dieu, & de la puissance de nostre mere nature : Et qu'il n'y a point de plus notable folie au monde, que de les ramener à la mesure de nostre capacité & suffisance. Si nous appellons monstres ou miracles, ce où nostre raison ne peut aller, combien s'en presente il continuellement à nostre veuë ? Considerons au travers de quels nuages, & comment à tastons on nous meine à la connoissance de la pluspart des choses qui nous sont entre mains : certes nous trouverons que c'est plustost accoustumance, que science, qui nous en oste l'estrangeté :

*b iam nemo fessus saturusque uiuendi,
Susplicere in cæli dignatur lucida templa,*

^a & que ces choses là, si elles nous estoient presentees de nouveau, nous les trouverions autant ou plus incroyables qu'aucunes autres.

*a si nunc primùm mortalibus adsint
Ex improviso, ceu sint obiecta repente,
Nil magis his rebus poterat mirabile dici,
Aut minus ante quod auderent fore credere gentes.*

^a Celuy qui n'avoit jamais veu de rivièrè, à la première qu'il rencontra, il pensa que ce fust l'Océan : & les choses qui sont à nostre connoissance les plus grandes, nous les jugeons estre les extremes que nature face en ce genre.

*b Scilicet & fluuius qui non est maximus, ei est
Qui non antè aliquem maiorem uidit, & ingens
Arbor homòque uidetur, & omnia de genere omni
Maxima quæ uidit quisque, hæc ingentia fingit.*

^b *Consuetudine oculorum assuescunt animi, neque admirantur, neque requirunt rationes earum rerum, quas semper vident.* ^b La nouuelleté des choses nous incite plus que leur grandeur, à en rechercher les causes. ^a Il faut juger avec plus de reuerence de cette infinie puissance de nature, & plus de reconnoissance de nostre ignorance & foiblesse. Combien y a il de choses peu vray-semblables, tesmoignees par gens dignes de foy, desquelles si nous ne pouuons estre persuadez, au moins les faut-il laisser en suspens ? car de les condamner impossibles, c'est se faire fort, par une temeraire presumption, de sçauoir jusques ou va la possibilité. ^c Si lon entendoit bien la difference qu'il y a entre l'impossibilité & l'iusité ; & entre ce qui est contre l'ordre du cours de nature, & contre la commune opinion des hommes, en ne croyant pas temerairement, ny aussi ne descroyant pas facilement : on observeroit la regle de Rien trop, commandee par Chilon. ^a Quand on trouue dans Froissard, que le Comte de Foix sceut en Bearn la deffaite du Roy Jean de Castille à Juberother, le lendemain qu'elle fut aduenue, & les moyens qu'il en allegue, on s'en peut moquer : & de ce mesme que nos Annales disent, que le Pape Honorius le propre jour que le Roy Philippe Auguste mourut ^b à Mante, ^a fit faire ses funerailles publiques, & les manda faire par toute l'Italie. Car l'authorité de ces tesmoings n'a pas à l'adventure assez de rang pour nous tenir en bride. Mais quoy ? si Plutarque outre plusieurs exemples, qu'il allegue de l'antiquité, dit sçauoir de certaine science, que du temps de Domitian, la nouvelle de la bataille perdue par Antonius en Allemagne à plusieurs journees de là, fut publiee à Rome, & semee par tout le mesme jour qu'elle auoit esté perdue : & si Cæsar tient qu'il est souvent aduenue que la renommee a devancé l'accident : dirons nous pas que ces simples gens là, se sont laissez piper apres le vulgaire, pour n'estre pas clairvoyans comme nous ? Est-il rien plus delicat, plus net, & plus vif, que le jugement de Pline, quand il luy plaist de le mettre en jeu ? rien plus esloigné de vanité ? je laisse à part l'excellence de son sçauoir, duquel je fay moins de conte : en quelle partie de ces deux là le surpassons nous ? toutesfois il n'est si petit escolier, qui ne le conuainque de mensonge, & qui ne luy vueille faire leçon sur le progres des ouurages de nature. ^a Quand nous lisons dans Bouchet les miracles des reliques de Saint

Hilaire ; passe : son credit n'est pas assez grand pour nous oster la licence d'y contredire : mais de condamner d'un train toutes pareilles histoires, me semble singuliere impudence. Ce grand Saint Augustin tesmoigne avoir veu sur les reliques Saint Gervais & Protaise à Milan, un enfant aveugle recouvrer la veuë : une femme à Carthage estre guerie d'un cancer par le signe de la Croix, qu'une femme nouvellement baptisee luy fit : Hesperius, un sien familier, avoir chassé les esprits qui infestoient sa maison, avec un peu de terre du Sepulchre de nostre Seigneur : & cette terre depuis transportee à l'Eglise, un Paralytique en avoir esté soudain guery : une femme en une procession ayant touché à la chasse Saint Estienne, d'un bouquet, & de ce bouquet s'estant frottee les yeux, avoir recouvré la veuë pieça perduë : & plusieurs autres miracles, ou il dit luy mesmes avoir assisté. Dequoy accuserons nous & luy & deux Saints Evesques Aurelius & Maximinus, qu'il appelle pour ses recors ? sera-ce d'ignorance, simplese, facilité, ou de malice & imposture ? Est-il homme en nostre siecle si impudent, qui pense leur estre comparable, soit en vertu & pieté, soit en sçavoir, jugement & suffisance ? « *Qui vt rationem nullam afferrent, ipsa autoritate me frangerent.* » C'est une hardiesse dangereuse & de consequence, outre l'absurde temerité qu'elle traîne quant & soy, de mespriser ce que nous ne concevons pas. Car apres que selon vostre bel entendement, vous avez estably les limites de la verité & de la mensonge, & qu'il se trouve que vous avez necessairement à croire des choses où il y a encores plus d'estrangeté qu'en ce que vous niez, vous vous estes desja obligé de les abandonner. Or ce qui me semble apporter autant de desordre en nos consciences en ces troubles où nous sommes, de la Religion, c'est cette dispensation que les Catholiques font de leur creance. Il leur semble faire bien les moderez & les entenduz, quand ils quittent aux adversaires aucuns articles de ceux qui sont en debat. Mais outre ce, qu'ils ne voyent pas quel advantage c'est à celui qui vous charge, de commencer à luy ceder, & vous tirer arriere, & combien cela l'anime à poursuivre sa pointe : ces articles là qu'ils choisissent pour les plus legers, sont aucunesfois tres-importans. Ou il faut se submittre du tout à l'autorité de nostre police Ecclesiastique, ou du tout s'en dispenser : Ce n'est pas à nous à establir la part que nous luy devons d'obeissance. Et d'avantage, je le puis dire pour l'avoir essayé, ayant autrefois usé de cette liberté de mon chois & triage particulier, mettant à nonchaloir certains poincts de l'observance de nostre Eglise, qui semblent avoir un visage ou plus vain, ou plus estrange, venant à en communiquer aux hommes sçavans, j'ay trouvé que ces choses là ont un fondement massif & tressolide : & que ce n'est que bestise & ignorance, qui nous fait les recevoir avec moindre reverence que le reste. Que ne nous souvient il combien nous sentons de contradiction en nostre jugement mesmes ? combien de choses nous servoient hyer d'articles de foy, qui nous sont fables aujourd'huy ? La gloire & la curiosité, sont les fleaux de nostre ame. Cettcecy nous conduit à mettre le nez par tout, & celle là nous deffend de rien laisser irresolu & indecis.